

家居醫書錄二種

家居醫錄目錄卷上

女科撮要

經候不調

經漏不止

經閉不行

帶下

血分水分

小便出血

熱入血室

師尼寡婦寒熱

歷節痛風

流注

癰瘰

乳癰乳巖

血風瘡

臙瘡

陰瘡

各症方藥

女科撮要目錄卷上

畢

女科撮要

女科撮要後序

易曰乾道成男坤

~~道成女~~

男女之所賦惟均而

疾則女恒多於男者蓋以陽嘗散緩陰多凝蓄

是故其氣愈滯其性愈執為多忿為多鬱為多

所好惡而肝脾不得其平矧且益之經乳胎產

變態百端良由是爾余嘗掌醫院及歸田凡所

治療獲效輒用手錄成帙題曰家居醫錄而於

婦人一科曰撮要焉慎所難也吾鄉侍御兩湖

王公見而悅之捐重俾登諸梓指示四方余謂
兩湖為王諫議為德為民溥矣而于林泉猶
有茲舉亦復視民如傷又可見矣若夫余之所
知則淺也安敢與陳臨江之良方並馳于天下
邪同志者幸為繼正之庶乎其無負侍御之心
矣

嘉靖丙午孟春吉日前奉政大夫太醫院院使

薛已書

家居醫錄卷上

女科撮要

吳郡立齋薛己著

中醫研究

經候不調

經曰飲食入胃遊溢精氣上輸於脾脾氣散精上歸於肺
通調水道下輸膀胱水精四布五經並行故心脾平和則
經候如常苟或七情內傷六淫外侵飲食失節起居失宜
脾胃虛損則月經不調矣若先期而至者有因脾經血燥
有因脾經鬱滯有因肝經怒火有因血分有熱有因勞役
火動其過期而至者有因脾經血虛有因肝經血少有因
氣虛血弱主治之法脾經血燥者加味道遙散脾經鬱滯

者歸脾湯肝經怒火者加味小柴胡湯血分有熱者加味
四物湯勞役火動者補中益氣湯脾經血虛者人參養榮
湯肝經血少者六味地黃丸氣虛血弱者八珍湯蓋血生
於脾土故云脾統血凡血病當用苦甘之劑以助其陽氣
而生陰血俱屬不足大凡肝脾血燥四物為主肝脾血弱
補中益氣為主肝脾鬱結歸脾湯為主肝經怒火加味道
遙為主

治驗

肝經怒火風熱等症附

一婦人內熱作渴飲食少思腹內近左初如鷄卵漸大四
寸許經水三月一至肢體消瘦齒頰似瘡脉洪數而虛左

關尤甚此肝脾鬱結之症外貼阿魏膏午前用補中益氣湯午後以加味歸脾湯兩月許肝火少退脾土少健仍與前湯送六味地黃丸午後又用逍遙散送歸脾丸又月餘日用蘆薈丸二服空心以逍遙散下日晡以歸脾湯下喜其謹疾調理年餘而愈

一婦人腹內一塊不時上攻或痛作聲吞酸痞悶月經不調小便不利二年餘矣面色青黃相兼余作肝脾氣滯以六君子加芎歸柴胡炒連木香吳茱各少許二劑却與歸脾湯下蘆薈丸三月餘肝脾和而諸症退又與調中益氣加茯苓丹皮中氣健而經自調

一婦人發熱口乾月經不調兩腿無力服祛風滲濕之劑
腿痛體倦二膝浮腫經事不通余作肝脾腎三經血虛火
燥症名鶴膝風用六味八味二丸兼服兩月形體漸健飲
食漸進膝腫漸消不半載而痊前症若脾腎虛寒腿足軟
痛或足膝枯細用八味丸若飲食過多腿足或臀內痠脹
或浮腫作痛用補中益氣加茯苓半夏主之

一婦人性沉靜勤於女工善怒小腹內結一塊或作痛或
痞悶月經不調恪服伐肝之劑內熱寒熱胸膈不利飲食
不甘形體日瘦牙齦蝕爛此脾土不能生肺金肺金不能
生腎水腎水不能生肝木當滋化源用補中益氣六味地

黃至仲春而愈

松江太守何恭人性善怒腹聚一塊年餘形體骨立倏熱
往來腭蝕透腮或泥春旺木尅土仍行伐肝時季冬肝脉
洪數按之弦緊餘脉微弱余曰洪數弦緊肝經真氣虛而
邪氣實也自保不及何能尅土况面色青中隱白乃腎水
不足肝木虧損肺金尅制惟慮至春木不能發生耳勉用
壯脾胃滋腎水之劑肝脉悉退後大怒耳內出血肝脉仍
大按之如無煩躁作渴此無根之火以前藥加肉桂二劑
肝脉仍歛熱渴頓退復因大怒以致飲食不進果卒於季
冬辛巳日此木衰弱而金刑尅信夫

一婦人經候過期發熱倦怠或用四物黃連之類反兩月一度且少而成塊又用峻藥通之兩目如帛所蔽余曰脾為諸陰之首目為血脉之宗此脾傷五臟皆為失所不能歸於目矣遂用補中益氣濟生歸脾二湯專主脾胃年餘尋愈

一婦人兩鬢稜痛後及太陽面青善怒余作膽經風熱用選奇湯合逍遙散加山梔天麻黃芪半夏黃芩而愈此症失治多致傷目或兩耳出膿則危矣

一婦人耳鳴內熱經行不調肢體倦怠飲食無味余以為肝脾虛熱用四君加柴胡山梔丹皮甘草而愈

一婦人素勤苦冬初患咳嗽發熱久而吐血盜汗經水兩
三月一至遍身作痛或用化痰降火口噤筋攣謂余曰何
也余曰此血虛而藥益損耳遂用加減八味丸及補中益
氣加麥門五味山藥治之年餘而痊

一婦人耳內或耳後項側作痛寒熱口苦月經不調余以
為肝火氣滯而血凝用小柴胡加山梔川芎丹皮治之諸
症悉退

一婦人年四十素性急先因飲食難化月經不調服理氣
化痰藥反肚腹膨脹大便泄瀉又加烏藥蓬朮肚腹腫脹
小便不利加猪苓澤瀉痰喘氣急手足厥冷頭面肢體腫

脹指按成窟脉沉細右寸為甚余曰此脾肺之氣虛寒不能通調水道下輸膀胱滲泄之令不行生化之氣不運即東垣所云水飲留積若土之在雨中則為泥矣得和風暖日水濕去而陽化自然萬物生長喜其脉相應遂與金匱加減腎氣丸料服之小便即通數劑腫脹消半四肢漸溫自能轉側又與六君加木香肉桂炮薑治之全愈後不戒七情飲食即為泄瀉仍用前藥加附子五分而安

一婦人飲食每用碗許稍加非大便不實必吞酸噯腐或以為胃火用二陳黃連枳實加內熱作嘔余曰此末傳寒中故噯氣吞酸脹滿痞悶不信仍作火治虛症並至月經

不止始信余以六君加炮薑木香數劑元氣漸復飲食漸進又以補中益氣加炮薑木香茯苓半夏數劑全愈後因飲食勞倦兼之怒氣飲食頓少元氣頓怯用前藥更加發熱誠似實火脉洪大按之而虛兩尺如無此命門火衰用補中益氣加薑桂及八味丸兼服兩月餘諸症悉愈此症若因中氣虛弱者用人參理中湯或六君子加木香炮薑不應用左金丸或越鞠丸虛寒者加附子或附子理中湯無有不愈

一婦人素有頭暈不時而作月經遲而少余以為中氣虛不能上升而頭暈不能下化而經少用補中益氣湯而愈

後因勞而仆月經如湧此勞傷火動用前湯加五味子一劑服之即愈前症雖云亡血過多氣無所附實因脾氣虧損耳

一婦人年四十勞則足跟熱痛余以為陰血虛極急用聖愈湯而痊後遍身搔痒誤服風藥發熱抽搐肝脉洪數此乃肝家血虛火盛而生風以天竺膽星為丸用四物麥門五味苳連炙草山梔柴胡煎送而愈

一婦人兩足發熱日晡益甚小便自遺或時不利余以為肝熱陰挺不能約制午前用白朮茯苓丹皮澤瀉各五分乾山藥山茱萸門各一錢熟地四錢酒炒黑黃栢七分知

毋五分不數劑而諸症悉愈若用分利之劑愈損其陰必致不起

一婦人月事未期而至發熱自汗服清熱止汗之劑反作渴頭痛手掉身麻此因肝經風熱用柴胡炒芩連炒山梔歸芍生地丹皮各一錢參芪苓朮各一錢五分川芎七分甘草五分二劑其汗全止更以補中益氣而愈凡發熱久者陽氣亦自病須調補之

一婦人經行後勞役失調忽然昏憤面赤吐痰此元氣虛火妄動急飲童便神思漸爽更用參芪各五錢芎歸各三錢玄參柴胡山梔炙草各一錢一劑又用逍遙散加五味

麥門稍定但體倦面黃此脾土真虛之色也又以十全大補加五味麥門治之而愈若投以發散之劑禍在反掌慎之

西賓錢思習子室年三十尚無嗣月經淋瀝無期夫婦異處者幾年矣思習欲為娶妾以謀諸余余曰此鬱怒傷肝脾虛火動而血不歸經乃肝不能藏脾不能攝也當清肝火補脾氣遂與加味歸脾逍遙二藥四劑送至其家仍告其姑曰服此病自愈而當受胎妾可無娶也果病愈次年生子

一婦人多怒經行或數日或半月即止三年後淋瀝無期